



22 APR, 2026

## TNB rugi RM5.49 bilion akibat bitcoin haram di Perak

Kosmo, Malaysia



## TNB rugi RM5.49 bilion akibat bitcoin haram di Perak



ANTARA mesin bitcoin yang dirampas dalam serbuan di sebuah premis di Manjung pada 2022. – POLIS PERAK

**IPOH** – Tenaga Nasional Berhad (TNB) merekodkan kerugian sebanyak RM5.49 bilion disebabkan kecurian elektrik akibat aktiviti perlombongan bitcoin di Perak sejak 2018 hingga Februari lalu.

Pengerusi Jawatankuasa Infrastruktur, Tenaga, Air dan Pengangkutan Awam Perak, Datuk Seri Mohammad Nizar Jamaluddin berkata, jumlah itu direkodkan hasil pemeriksaan ke atas 4,283 premis yang dikesan mengubah suai meter atau penyambungan bekalan elektrik secara haram.

"Setakat Februari lalu, TNB mengambil tindakan ke atas 17,489 premis di seluruh negara termasuk 4,283 premis di Perak. Untuk makluman, Perak merekodkan jumlah kes kedua tertinggi di Semenanjung bagi aktiviti perlombongan haram bitcoin.

"Aktiviti ini menyebabkan TNB mengalami kerugian RM5.49 bilion," katanya ketika sesi pengumuman Usul Menjunjung Kasih Titah Sultan Perak dalam Sidang Dewan Undangan Negeri Perak, di sini semalam.

Menurut beliau, daerah Man-

jung merekodkan kes tertinggi dengan kerugian sebanyak RM53.4 juta membabitkan 1,742 premis.

Perak Tengah turut mencatatkan bilangan kes yang tinggi melibatkan 857 premis dengan jumlah kerugian RM26.2 juta.

"Kebanyakan kes di dua kawasan tersebut merupakan kes berulang," katanya.

Tambahnya, peningkatan nilai mata wang kripto sebanyak 732 peratus dari 2018 hingga Februari lalu menjadi antara punca peningkatan mendadak aktiviti haram tersebut.

Sehubungan itu, katanya, penglibatan pihak berkuasa tempatan (PBT) adalah penting bagi membendung kegiatan tersebut daripada terus berleluasa.

"PBT mempunyai kuasa dalam aspek premis, pelesenan, penggunaan tanah dan keselamatan bangunan. PBT juga dapat membantu menutup atau menyita premis terlibat, sekali gus memperkukuhkan tindakan bersepadu bagi membanteras aktiviti haram itu dengan lebih menyeluruh dan berkesan," katanya.